



Sud Bosne i Hercegovine
Суд Босне и Херцеговине

Broj: S1 3 Iž 039888 21 Iž
Sarajevo, 02.03.2021.godine

Sud Bosne i Hercegovine u Sarajevu, u vijeću Apelacionog odijeljenja sastavljenom od sudija, Vesne Trifunović predsjednik vijeća, Dinke Bešlagić Čovrk i Srete Crnjak, članova vijeća, odlučujući o žalbi političkog subjekta Savez za bolju budućnost SBB, sa sjedištem u Sarajevu, ulica Tešanjaska 24, kojeg zastupa predsjednik Fahrudin Radončić, izjavljenoj protiv odluke Centralne izborne komisije Bosne i Hercegovine broj: 06-1-07-3-113/21 od 26.02.2021. godine, u nejavnoj sjednici, održanoj dana 02.03.2021.godine, donio je

R J E Š E N J E

Žalba se odbija.

O b r a z l o ž e n j e

Centralna izborna komisija Bosne i Hercegovine, broj: 06-1-07-3-113/21 od 26.02.2021. godine, donijela je odluku o utvrđivanju rezultata posrednih izbora i dodijeli mandata iz Općinskog vijeća Novo Sarajevo za Gradsko vijeće Grada Sarajeva kako slijedi:

1. kandidatska lista političke stranke NAROD I PRAVDA, dobila je pet (5) glasova,
2. kandidatska lista političke stranke POG NAŠA STRANKA, dobila je pet (5) glasova,
3. kandidatska lista političke stranke ALMA ČENGIĆ, dobila je četiri (4) glasa,
4. kandidatska lista političke stranke "KORORA I OSTALI", dobila je osam (8) glasova,
5. kandidatska lista političke stranke MARIJELA HAŠIMBEGOVIĆ, dobila je tri (3) glasa,
6. kandidatska lista političke stranke PLATFORMA ZA PROGRES, dobila je nula (0) glasova,
7. kandidatska lista političke stranke SAVEZ ZA BOLJU BUDUĆNOST SBB, dobila je tri (3) glasa,
8. kandidatska lista grupe vijećnika DANIJELA ŠAHAT, RIAD IDRIZOVIĆ I EMIR RUSTEMPAŠIĆ, dobila je tri (3) glasa.

Centralna izborna komisija Bosne i Hercegovine dodijelila je mandate u Gradsko vijeće Grada Sarajeva uiz Općinskog vijeća Novo Sarajevo sljedećim vijećnicima:

1. Samir Bejić (Ostali),

2. Mirela Džehverović (Ostali),
3. Alma Čengić (Bošnjak),
4. Elvedin Korora (Bošnjak),
5. Marijela Hašimbegović (Hrvat),
6. Danijela Šahat (Hrvat),
7. Srđan Srdić (Srbin).

Ovu odluku pobija politički subjekt Savez za bolju budućnost SBB zbog povreda odredaba Izbornog zakona BiH i Statuta Grada Sarajeva, pogrešno i nepotpuno utvrđenog činjeničnog stanja i pogrešne primjene propisa.

Podnosilac žalbe navodi da je lista SBB BiH imala 2 kandidata I ukupno 3 glasa, te da je kandidat Rovčanin Edin imao količnik 3 u posrednim izborima je dijelio 6.7. i 8. mjesto na listi. Napominje da je na listi vijećnika "Margeta Šahimbegović" Margeta Hašimbegović bila prvoplasirana i imala količnik 3, a drugoplasirani je bio Srđan Srdić koji je u Gradsko Vijeće ušao kao pripadnik reda konstitutivnog naroda "srpske" nacionalnosti. Zbog navedenog logično je bilo da je Srdić Srđanu dodijeljen mandate na uštrb nosioca njegove liste Margeta Hašimbegović, a ne na uštrb nosioca SBB BiH liste Edina Rovčanina.

Predlaže da se žalba usvoji i kandidatu pod rednim brojem 1 sa liste žalitelja SBB BiH Edinu Rovčaninu dodijeli mandate Gradskog vijećnika Grada Sarajeva ili da se pobijana odluka vrati Centralnoj izbornoj komisiji na ponovno odlučivanje.

Centralna izborna komisija Bosne i Hercegovine u odgovoru na žalbu je predložila se ista odbije kao neosnovana.

Žalba nije osnovana.

Prema shvatanju ovog apelacionog vijeća, pobijanom odlukom je potpuno i pravilno utvrđeno činjenično stanje i pravilno primijenjeno materijalno pravo.

Na osnovu stanja u spisu predmeta Centralna izborna komisija BiH je nakon uvida u cjelokupan material o provedenim posrednim izborima za Gradsko vijeće Grada Sarajeva, u postupku izbora vijećnika za Gradsko vijeće Grada Sarajeva, pravilno utvrdila da je od 31 vijećnika u Općinskom vijeću Novo Sarajevo, glasao 31 vijećnik za prethodno ovjerenih osam (8) kandidatskih listi nakon čega je utvrdila rezultate za svaku kandidatsku listu političke stranke, odnosno grupe vijećnika broj osvojenih glasova, imajući u vidu odredbu člana 22 Statuta Grada Sarajeva svako općinsko vijeće vrši izbor po sedam (7) delegata u Gradsko vijeće.

Odredbom člana 13.10 stav (2) Izbornog zakona Bosne i Hercegovine propisano je da se mandati za gradsko vijeće, odnosno skupštinu grada dodjeljuju kandidatskim listama po sistemu proporcionalne zastupljenosti političkih stranaka, koalicije, listi nezavisnih kandidata ili grupa članova kao što je utvrđeno u članu 13.5 ovog Zakona. Raspodjela mandata među kandidatima sa liste vrši se prema redoslijedu na listi kandidata za ove izbore.

Raspodjelom mandata prema utvrđenim rezultatima osvojenih glasova svake kandidatske liste političke stranke navedene u stavu 1 pobijane odluke bila bi delegirana

dva vijećnika iz reda bošnjačkog naroda, dva vijećnika iz reda hrvatskog naroda, tri vijećnika iz kategorije ostalih, te nijedan vijećnik iz reda srpskog naroda.

Međutim, u tom slučaju ne bi bila ispoštovana odredba člana 23 stav (5) Statuta Grada Sarajeva, da svako općinsko vijeće koje čini Grad Sarajevo delegira najmanje jednog kandidata iz reda konstitutivnog naroda, što u konkretnom slučaju za Općinsko vijeće Novo Sarajevo za Gradsko vijeće, od sedam izabranih gradskih vijećnika, nije delegiralo najmanje jednog vijećnika iz reda srpskog naroda. Zato je odredbom člana 23 stav (11) Statuta propisano da u ovakvoj situaciji kada se ne dobije potrebna zastupljenost vijećnika iz pojedinog konstitutivnog naroda, umjesto izabranog vijećnika za Gradsko vijeće s najmanjim količnikom iz reda naroda za koji je i bez tog vijećnika zadovoljena minimalna zastupljenost, delegira se općinski vijećnik pripadnik naroda kojim je zastupljen u potrebnom broju među delegatima iz tog općinskog vijeća, a koji je na kandidatskoj listi kojoj pripada sljedeći najveći količnik. Ukoliko na toj kandidatskoj listi nema kvalifikovanog kandidata, utvrđuje se sljedeći najveći količnik i tako sve dok se ne dođe do kvalifikovanog kandidata.

Stoga je pravilna odluka Centralne izborne komisije Bosne i Hercegovine kada je u skladu sa citiranom odredbom Statuta umjesto izabranog vijećnika za Gradsko vijeće Grada Sarajeva s najmanjim količnikom sa kandidatske liste političke stranke SAVEZ ZA BOLJU BUDUĆNOST SBB, Rovčanin Edina, delegiran općinski vijećnik sa kandidatske liste Grupa Općinskih vijećnika MARIJELA HAŠIMBEGOVIĆ Srdić Srđan, iz reda srpskog naroda. Upravo iz razloga što se na kandidatskim listama GRUPA VIJEĆNIKA – MARIJELA HAŠIMBEGOVIĆ I GRUPA OPĆINSKIH VIJEĆNIKA DANIJELA ŠAHAT, RIAD IDRIZOVIĆ I EMIR RUSTEMPAŠIĆ na poziciji pod rednim brojem 1. Nalaze delegirani vijećnici iz reda hrvatskog naroda, te bi oduzimanjem mandata bila narušena minimalna nacionalna struktura..

Iz navedenih razloga apelaciono vijeće nalazi da je pobijana odluka Centralne izborne komisije Bosne i Hercegovine pravilna i zakonita, a žalba neosnovana, pa je istu primjenom odredbe člana 81. stav 1. Zakona o upravnim sporovima Bosne i Hercegovine („Službeni glasnik BiH“, br. 19/02, 88/07, 83/08 i 74/10) valjalo odbiti.

**PREDSJEDNIK VIJEĆA
SUDIJA
Trifunović Vesna**

